



Акафист святым благоверным страстотерпцем князем Борису и Глебу

Кондак 1

Избраннии чудотворцы и доблественнии воины Христо́ви, блага́го ко́рене блази́и о́трасли, пресвѣтлая дво́ице, в недúзех безмѣзднии врачеве и ко Спа́су о всѣм ми́ре тѣплии моли́твенницы, восхваля́ем васъ любóвию, святи́и и благове́рнии кня́зие Бори́се и Гле́бе. Вы́ же, я́ко иму́щии дерзнове́ние ко Пресвяте́й Тро́ице, от вся́ких насъ бѣд изба́вите, да зове́м к вамъ: Ра́дуйтесь, Бори́се и Гле́бе, вели́кии и сла́внии страстоте́рпцы.

Икос 1

А́нгелов Госпо́дних согра́ждане яви́стеся, святи́и благове́рнии Бори́се и Гле́бе, не оста́вьше согра́ждан земна́го ми́ра: по страда́нии бо ва́шем честна́я телеса́ ва́ша, мучени́ческою кро́вию обагрѣ́нная и благода́тию Бо́жиею просла́вленная, всѣм с ве́рою к нимъ притека́ющим исто́чают много́различна́я чуде́сная исцелѣ́ния; ду́ши же ва́ша предстоя́т с лики а́нгельскими и со все́ми святи́ми Пресвяте́й Тро́ице. Те́мже мы́ удивля́ющеся

ва́шему го́рнему и до́льному гра́жданству,
благоговѣ́йно прекло́няюще пред ва́ми ко́лена и
сердца́ на́ша, уми́льно во́пием си́це:

Ра́дуйте́ся, оде́жды креще́ния непоро́чнии
хранителие;

ра́дуйте́ся, хри́стиа́нскаго благоче́стия
присни́и ревни́телие

Ра́дуйте́ся, Боже́ственных пи́саний учени́цы
до́бри;

ра́дуйте́ся, о́тца́ благове́рнаго ча́да
возлю́бленная.

Ра́дуйте́ся, Ева́нгелия Христо́ва
после́дователие и́стиннии;

ра́дуйте́ся, Бо́гови сло́вом и жи́тием
благоугоди́вшии.

Ра́дуйте́ся, чу́дным све́том богопозна́ния
просвеще́ннии;

ра́дуйте́ся, ви́ссом чистоты́ и непоро́чности
облече́ннии.

Ра́дуйте́ся, неустраши́мо муче́ния прие́мшии;

ра́дуйте́ся, Го́споду Иису́су Христу́ в стра́тѣх
подража́вшии.

Ра́дуйте́ся, все́льшиися во оби́тели О́тца
Небе́снаго;

ра́дуйте́ся, восприе́мшии от Го́спода мзду́
трудо́в и терпе́ния.

Ра́дуйте́ся, Бори́се и Гле́бе, вели́кии и сла́внии
стра́стоте́рпцы.

Кондак 2

Ви́деша сы́нове Росси́йстии, ка́ко испо́лнися святы́й хра́м благоуха́ния пречу́днаго, егда́ отверзо́ша ра́ку вашу́, и просла́виша вси Го́спода. Те́мже и мы́, грёшнии и недосто́йнии, благоговё́юще пред пречу́дною святы́нею, прославля́ем Дивна́го во святы́х Свои́х Бо́га, непреста́нно вопи́юще: Аллилу́иа.

Икос 2

Ра́зум здра́вый стяжа́ли есте́ святы́м и богоуго́дным жити́ем ва́шим, страстоте́рпцы Христо́вы Бори́се и Гле́бе. Егда́ услы́шасте о умы́шлении ка́инском лю́таго и властолю́биваго бра́та ва́шего Святопо́лка, нима́ло не помы́слисте проти́ву его́ ра́тию ити́; возжела́сте па́че жи́зни свое́я лишиться́, не́жели с бра́том имéти бра́нь. Сего́ ра́ди мы́, предстоя́ще моли́твенно пред ва́ми, возво́дим очеса́ на́ша серде́чная горе́, к ва́м, на небеси́ живу́щим, почита́юще честна́я ва́ша страда́ния сими́ похва́льными пе́снями:

Ра́дуйтесь, су́етных помы́шлений презри́телие;
ра́дуйтесь, за́поведей Христо́вых исполните́лие.

Ра́дуйтесь, тмы́ грехо́вныя попра́телие;
ра́дуйтесь, венце́носцы нарочити́и.

Ра́дуйтесь, ника́коже к земны́м се́рдце свое́ прилепи́вшии;

ра́дуйтеся, Жива́го Бо́га па́че все́го ми́ра
возлю́бившии.

Ра́дуйтеся, оправда́ний Господ́них пресвѣ́тлыя
свещи́;

ра́дуйтеся, небѣ́сных бла́г прича́стницы.

Ра́дуйтеся, пресла́дцыи слы́шателие
Божѣ́ственныхъ словесъ;

ра́дуйтеся, те́плии ко Спа́су о нас
моли́твенницы.

Ра́дуйтеся, кро́вию свое́ю убелѣ́ннии;

ра́дуйтеся, заре́ю Трисо́лнечнаго Свѣ́та
озарѣ́ннии.

Ра́дуйтеся, Бори́се и Гле́бе, вели́кии и сла́внии
страстоте́рпцы.

Кондак 3

Си́лою Божѣ́ственною подви́заеми
покрови́телие естѣ́ нам, защи́тницы и
помощни́цы; страну́ бо на́шу от нападе́ний
вра́жиих избавля́ете, стра́ждущих от вся́ких
неду́гов и болезне́й исцеля́ете и во вся́ком бла́зе
преспе́яние да́руете все́м, вопи́ющим Бо́гу:
Аллилу́иа.

Икос 3

Иму́ще вои́стинну во́ини Христовы́, Бори́се и
Гле́бе, пла́менное се́рдце ко благохвалѣ́нию
дѣ́внаго в чуде́сѣх Бо́га, мо́литесь непреста́нно о
спасѣ́нии ду́ш к ва́м усер́дно прибега́ющих. Сего́

ради мы от глубины сердец наших умиленно приносим вам таковая пения:

Радуйтесь, Господу славы выну предстоящи;
радуйтесь, ангельскую трисвятую песнь слышащи.

Радуйтесь, горняго Иерусалима имении граждане;

радуйтесь, Царства Христова добрии наследницы.

Радуйтесь, невечерняго дне зрителие;

радуйтесь, нерукотворнаго храма обитателие.

Радуйтесь, райских селений созерцателие;

радуйтесь, слепым прозрения подателие.

Радуйтесь, домов благочестивых посетителие;

радуйтесь, нерадящих о благочестии наказателие.

Радуйтесь, великих праздников почитания наставницы;

радуйтесь, в добродетелех преспевающих споспешницы.

Радуйтесь, Борисе и Глебе, великии и славнии страстотерпцы.

Кондак 4

Бурею неверия одержимых и ходящих во тьме злочестия огнем наказания опаляете, да уцеломудрившеся истинно познают истиннаго Бога, благочестно Его чтуще и со страхом Ему вопиюще: Аллилуиа.

Икос 4

Слы́шаще ва́ша, страстоте́рпцы святыи Бори́се
и Гле́бе, чуде́са, россия́стии сы́нове не то́кмо из
бли́жних, но и из да́льных стра́н стека́хуся к
ва́шим чуде́йственным мо́щем, и,
исцеля́ющесея от неду́гов и боле́зней, вопия́ху к
ва́м такова́я:

Ра́дуйтеся, божество́вныя лозы́ пресла́дцыи
ро́ждие;

ра́дуйтеся, новопросвеще́нныя земли́ кра́снии
цвѣти.

Ра́дуйтеся, пе́рвии просла́вленнии на Руси́
уго́дницы;

ра́дуйтеся, в беда́х и ну́ждах благоче́стивым
посо́бницы.

Ра́дуйтеся, вели́цыи в напа́стех утѣшителие;

ра́дуйтеся, ве́ры Христо́вой ревни́телие.

Ра́дуйтеся, Божество́вныя службы́ пла́меннии
любителие;

ра́дуйтеся, благоче́стия до́брии строителие.

Ра́дуйтеся, хромы́м хождѣ́ния пода́телие;

ра́дуйтеся, о спасѣ́нии ро́да христиа́нскаго
хода́таи.

Ра́дуйтеся, виногра́да Христо́ва целе́бныя
вѣтви;

ра́дуйтеся, и́стиннии и безме́зднии вра́чеве.

Ра́дуйтеся, Бори́се и Гле́бе, вели́кии и сла́внии
страстоте́рпцы.

Кондак 5

Боготечныя звёзды явистеся нам
путеводствующии: внегда обуреватися нам
волнами житейских попечений и опасно
шествовати к тихому пристанищу, светом
молитв ваших избавляеми есмы от блуждения и
потопления. Сего ради, славяще Господа,
вопиём: Аллилуиа.

Икос 5

Видеша сынове российстии, яко притекающи
с верою приемлют ходатайством вашим в
нуждах скорое утешение и от зол избавление,
темже восхваляют вас сице:

Радуйтеся, идольского нечестия обличителие;
радуйтеся, мудрых ко благочестию
управителие.

Радуйтеся, гордыни и буесловия посрамителие;
радуйтеся, злобы и мщения угасителие.

Радуйтеся, враждующих на отечество
укротителие;

радуйтеся, полчищ вражеских расточителие.

Радуйтеся, мира и тишины восстановителие;

радуйтеся, Христовы добрии воителие.

Радуйтеся, благородство земное носившии,

радуйтеся, кровию порфиру освятившии,

Радуйтеся, прославившии Спаса
страстотерпцы;

радуйтеся, прославленнии от Бога чудотворцы.

Ра́дуйтеся, Бори́се и Гле́бе, вели́кии и сла́внии
страстоте́рпцы.

Кондак 6

Пропове́дующи пропове́дует вся Ру́сская земля́
ва́ше небе́сное предста́тельство у Всевы́шняго:
вы́ бо я́ко крѣпцыи щити́ и я́ко твёрдыя стѣны́,
огражда́ете Оте́чество ва́ше непобеди́мым
ору́жием, благода́тию Божѣ́ственною,
дарова́нною вамъ свы́ше, сего́ ра́ди, хва́ляще
Бо́га, поёмъ: Аллилу́иа.

Икос 6

Воссия́ли есте́, я́ко пресвѣ́тлыя звѣзды
просвещѣ́нием Свята́го Крещѣ́ния среди́ тьмы́
идолослужѣ́ния, ве́ру бо правосла́вную приѣ́мше
семена́ благоче́стия христи́анскаго в сердца́х
по́дданныхъ своихъ посе́ясте и на славосло́вие
и́мене Бо́жия хра́мы боголе́пно сооруди́сте. Сего́
ра́ди, свя́тии Бори́се и Гле́бе, васъ почита́емъ си́ми
похва́льными пѣ́снями:

Ра́дуйтеся, идо́льския ле́сти обли́чителие;

ра́дуйтеся, дре́вняго зми́я попрáтелие.

Ра́дуйтеся, жити́я непорочна́го рачи́телие;

ра́дуйтеся, ева́нгельскихъ пропове́даний
блюсти́телие.

Ра́дуйтеся, те́рния поро́ковъ ре́вностнии
искорени́телие;

ра́дуйтеся, подвигополо́жнику Христу́ последователю.

Ра́дуйтеся, и́стиннии образи крото́сти и незло́бия;

ра́дуйтеся, благода́ти си́лу подаю́щии мно́гим.

Ра́дуйтеся, нерастле́ннии хра́ми Бо́га Жива́го;

ра́дуйтеся, добродете́лей чи́стая зерца́ла.

Ра́дуйтеся, в чу́дный свѣ́т богопозна́ния пресельни́цы;

ра́дуйтеся, вели́цыи Христо́вы уго́дницы.

Ра́дуйтеся, Бори́се и Гле́бе, вели́кии и сла́внии страстоте́рпцы.

Кондак 7

А́ще и мно́гажды злоумы́шленнии язы́цы покуша́хуся вни́ти вну́тръ Оте́чества на́шего и одоле́ти его́, о́баче неви́димым ва́шим предста́тельством пред Бо́гом постыжде́ни и прогна́ни бы́ша. Те́мже удивля́ющесе неизрече́нному к нам Бо́жию милосе́рдию, поём: Аллилу́иа.

Икос 7

Но́выя благода́ти бы́вшии прича́стницы и даро́в Свята́го Ду́ха испо́лненнии, не то́чию в земли́ на́шей яви́лися есте́ до́брии споспеше́нницы ве́ры и нра́вов благи́х; но среди́ чужди́х наро́дов сла́ву и́мене Господня́ и си́лу мыш́цы Его́ яви́сте. Сего́ ра́ди похва́льными пе́сньми ва́с ублажа́ем:

Ра́дуйтеся, неувяда́емии цвѣти земли́ ру́сския;
ра́дуйтеся, вертограда́ небѣснаго благоле́пнии
гроздие.

Ра́дуйтеся, непоро́чнии а́гнцы ста́да Христо́ва;
ра́дуйтеся, я́ко голу́бие, украше́ннии чистото́ю.
Ра́дуйтеся, на криле́х ве́ры возне́сшиися;
ра́дуйтеся, в Небе́сный Иерусали́м
пресельшиися.

Ра́дуйтеся, го́рняго Сио́на насле́дницы;
ра́дуйтеся, лико́в небѣсных собесѣ́дницы.

Ра́дуйтеся, я́ко зла́то в горни́ле, искуше́ннии;
ра́дуйтеся, к ли́ку му́ченик причте́ннии.

Ра́дуйтеся, Христо́вы Цѣ́ркве вели́кое
удобрѣ́ние;

ра́дуйтеся, христиа́ном подате́лие ра́дости
неизрече́нныя.

Ра́дуйтеся, Бори́се и Гле́бе, вели́кии и сла́внии
страстоте́рпцы.

Кондак 8

Стра́нная и ужа́сная соде́яшася, егда́
злочестивый ва́ряг дерзну́ попрати́ ме́сто свято,
иде́же почи́ваху блаже́нная телеса́ ва́ша: о́гнь бо
изы́де из земли́, опали́ ока́яннаго и ве́дати научи́
си́лу ва́шу, уго́дницы Бо́жии. Ве́рнии же,
прославля́юще чуде́йства ва́ша, воспѣ́ша
Дивно́му во святы́х Свои́х Бо́гу: Аллилу́иа.

Икос 8

Весь ум вперивше в службу Божественную и
духовная псалмопения, явились есте
непобедимии Христовы адаманты, егда
нечестивии человецы приидоша от лютаго
Святополка руки на вас возложити и
неповинную кровь вашу пролити. Мы же,
вернии, чувствующе веру и страдания ваша,
взываем сице:

Радуйтесь, службу Божию в пути не
оставлявшии;

радуйтесь, богодуховенное пение сладостно
внушавшии.

Радуйтесь, Божественная словеса во устех
своих державшии,

радуйтесь, в сердце сокровище молитвы
стяжавшии.

Радуйтесь, Агнца Божия истиннии
исповедницы;

радуйтесь, апостольских проповеданий
ревнительнии преёмницы.

Радуйтесь, святых отцев преданий вернии
блюстителие;

радуйтесь, братолюбия и послушания
хранителие.

Радуйтесь, яко живот вечный паче временнаго
возлюбисте;

ра́дуйте́ся, я́ко Ца́рство Небе́сное земно́му
предпочто́сте.

Ра́дуйте́ся, я́ко се́рдце смире́нное в же́ртву
Бо́гу принесо́сте;

ра́дуйте́ся, я́ко в ве́ре Христо́вей мно́гих
утверди́сте.

Ра́дуйте́ся, Бори́се и Гле́бе, вели́кии и сла́внии
страстоте́рпцы.

Кондак 9

Вси́ ве́рнии чту́т благоговейно́ па́мь ва́шу: во
святы́и хра́мы сте́кающе́ся, сла́вят страда́ния
ва́ша и возвеща́ют чуде́са, я́же соде́ясте си́лою
Бо́га и Спа́са на́шего, Ему́же вопие́м: Аллилу́иа.

Икос 9

Вети́и неве́рнии всуе́ тружда́ются
му́дрствовати о святы́ни ва́шей, Бори́се и Гле́бе
достохва́льнии: недоуме́ют бо изре́щи, ка́ко
бре́ннии мо́щи чудотвора́т и челове́цы со а́нгелы
спросла́вляю́тся. Мы́ же, просвеща́еми ве́рою,
благоле́пно вопие́м:

Ра́дуйте́ся, Ца́ря сла́вы просла́вление;

ра́дуйте́ся, кня́зя тьмы́ посра́мление.

Ра́дуйте́ся, глаго́лов Бо́жих исполне́ние;

ра́дуйте́ся, Боже́ственныя пре́мудрости
о́правда́ние.

Ра́дуйте́ся, чуде́с Христо́вых пропове́дницы;

ра́дуйте́ся, ве́чныя ра́дости насле́дницы.

Ра́дуйтеся, во́ини Христо́ви непобеди́мии;
ра́дуйтеся, броня́ во́инства на́шего
необори́мая.

Ра́дуйтеся, я́ко жи́знь грядúщую возлю́били
есте́;

ра́дуйтеся, я́ко бла́га вре́менная презре́ли есте́.

Ра́дуйтеся, я́ко по́мыслы ве́ка сего́ отрину́ли
есте́;

ра́дуйтеся, я́ко красото́ю добродете́лей
украше́ни есте́.

Ра́дуйтеся, Бори́се и Гле́бе, вели́кии и сла́внии
страстоте́рпцы.

Кондак 10

Спасти́ хотя́ще ду́ши своя́, святы́и
страстоте́рпцы, небрего́сте о телесе́х ва́ших и
преда́сте их на уби́ение, вопи́юще Бо́гу:
Аллилу́иа.

Икос 10

Стены́ есте́, огражда́ющия Русь, святы́и Бори́се
и Гле́бе, и неутомимии стра́жи проти́ву враг
на́ших пребыва́ете, непреста́нно моля́щися
Го́споду Бо́гу о спасе́нии ду́ш на́ших и
исцеля́юще немо́щи на́ша. Сего́ ра́ди уми́льно
вопи́ем ко святы́ни ва́шей:

Ра́дуйтеся, я́ко сы́нове росси́йстии
ходата́йством ва́шим спаса́ются;

ра́дуйтеся, я́ко вси́ ве́рнии моли́твами ва́шими
от бе́д и скорбе́й изба́вляю́тся.

Ра́дуйтеся, я́ко врази́ на́ши ва́с устраша́ются и
в бе́гство обра́щаются;

ра́дуйтеся, я́ко Оте́чество на́ше заступле́нием
ва́шим утвержда́ется.

Ра́дуйтеся, я́ко похва́льными венцы́ Це́рковь
ва́с венча́ет;

ра́дуйтеся, я́ко по́двиги ва́ша право́вернии
немо́лчно воспева́ют.

Ра́дуйтеся, я́ко ста́рцы и ю́ноши к покрóву
ва́шему прибега́ют;

ра́дуйтеся, я́ко ца́рие и во́ини, бога́тии и
убо́зии ва́с прославля́ют.

Ра́дуйтеся, му́ченическую сме́рть прие́мшии;

ра́дуйтеся, терпе́нием жизньъ ве́чную
стяжавшии.

Ра́дуйтеся, ско́рии помо́щницы;

ра́дуйтеся, благомо́щнии заступни́цы.

Ра́дуйтеся, Бори́се и Гле́бе, вели́кии и сла́внии
страстоте́рпцы.

Кондак 11

Пе́ние всеумиле́нное не умо́лче во усте́х ва́ших,
егда́ лю́тии губите́лие устреми́шася на ва́с, я́ко
на а́гнцев, гото́вых на заколе́ние. Си́е
воспомина́юще и сла́вяще Го́спода, да́вшего ва́м
си́лу такую́ю, взыва́ем к Нему́: Аллилу́иа.

Икос 11

Светозарныя свещи зрим вас, святїи благовернии князие Борисе и Глебе, освещающии Русскую Церковь и всех верных чад ея, да прославляют святую память вашу, вопиюще:

Радуйтеся, во едином душе благочестия ходившии;

радуйтеся, в братском единении и любви пожившии.

Радуйтеся, подражавшии искупльшему нас Владыце;

радуйтеся, славнии и всехвальнии мученицы.

Радуйтеся, подвизавшиися подвигом добрым;

радуйтеся, венчаннии венцем славы невечерняя.

Радуйтеся, течение жития мученически скончавшии;

радуйтеся, во обители Отца Небесного водворившиися.

Радуйтеся, Русския Церкви похвало;

радуйтеся, градів наших лепото.

Радуйтеся, сынове и заступницы земли Русския;

радуйтеся, яко память ваша приснославна.

Радуйтеся, Борисе и Глебе, великии и славнии страстотерпцы.

Кондак 12

Благода́ть, да́нную ва́м от Бо́га на бла́го сынóв Руси́, о чудотворцы́ Бори́се и Гле́бе, не вту́не оста́вили есте́: яви́сте бо ся́ целите́лие боля́щих, утешите́лие су́щих в ско́рбех и заклю́чениях, наста́вницы заблуждших и ско́рии помо́щницы всём, с ве́рою призы́вающим ва́с и вопи́ющим ко Го́споду: Аллилу́иа.

Икос 12

Пою́ще и восхваля́юще чудеса́ ва́ша, чествует́ святу́ю па́мять ва́шу пресла́вная Це́рковь Ру́сская, и мы́, ча́да ея́, о́чи се́рдца возводя́ще ко Го́споду, си́це вопие́м:

Ра́дуйтеся, ко́рене честна́го бла́гя о́трасли;
ра́дуйтеся, соприча́стницы а́нгельскаго со́нма.

Ра́дуйтеся, сопроти́вных победи́телие;
ра́дуйтеся, недугующих вра́чеве.

Ра́дуйтеся, гра́дов и ве́сей на́ших пресве́тлое сия́ние;

ра́дуйтеся, во́инства ру́скаго твёрдое огражде́ние.

Ра́дуйтеся, я́ко страда́ньми ва́шими сниска́сте ра́дость ве́чную;

ра́дуйтеся, я́ко муче́ньми прешли́ есте́ к блаже́нному безсме́ртию.

Ра́дуйтеся, в горни́ле лю́тых обстоя́ний искуше́ннии;

ра́дуйтеся, добро́тою благоче́стия чистее́ злата́ блиста́ющихи.

Ра́дуйтеся, Бо́гови всепло́дие себе́ прине́сшии;
ра́дуйтеся, живота́ вечно́го и Ца́рствия Бо́жия наследи́цы.

Ра́дуйтеся, Бори́се и Гле́бе, вели́кии и сла́внии страстоте́рпцы.

Кондак 13

О, святи́и и всесла́внии чудотво́рцы Бори́се и Гле́бе, вели́цыи россия́стии помо́щницы в беда́х и напа́stech! Не презри́те на́с, грешных, но приими́те моле́ние на́ше, я́коже прия́ли есте́ моли́твы благове́рных россия́ских князе́й Алекса́ндра и Дими́трия, и принеси́те Всеми́лостивому Спа́су на́ше моле́бное приноше́ние, да изба́вит на́с от всяких бе́д и напа́стей, да охра́нит Оте́чество на́ше от вра́г ви́димых и неви́димых, е́же нам в ми́ре глубо́це пе́ти с ва́ми Бо́гу: Аллилу́иа.

Молитва

О, святи́и страстоте́рпцы, боголюби́вая дво́ице, благове́рнии князие Бори́се и Гле́бе, измла́да всею́ душо́ю Христа́ возлюбившии, целому́дрие, кро́тость, смире́ние и проче́я добродете́ли стяжа́вшии и, я́ко агнцы незло́бивии, от бра́та своего́ непра́ведное уби́ение претерпе́вшии, чи́стыя своя́ ду́ши в

благоприятную жертву Богу принеся и от Него венцы нетленные приемши! Припадающе к честному образу вашему, молим вас в душе сокрушенно и смиренно: вознесите свои усердные молитвы ко Всемилостивому Спасу, да подаст нам, чтущим святую память вашу, великия Своя и богатая милости. Церковь Свою Святую да соблюдет от ересей и расколов, в чадех ея да оживит дух правыя веры и любви, дух ведения и благочестия, да дарует всем нам вся к жизни временней и вечней потребная. Ей, святейи страстотерпцы, ускорите на помощь нам, якоже сроднику вашему благоверному князю Александру Невскому, и избавите страну нашу от враг видимых и невидимых, от глады, огня, смертоносныя язвы, от всяких бед и напастей; разжените облегающий ны мрак неверия и развращения, да мирно и благочестно проживем в веце сем, и сподобимся христианския кончины и добраго ответа на страшнем Суде Христа Бога нашего, Емуже подобает честь и поклонение со Безначальным Его Отцем и Пресвятым и Благим и Животворящим Его Духом, ныне и присно и во веки веков. Аминь.

Текст службы утвержден на заседании Священного Синода 8 декабря 2020 года (журнал № 99)